

I museganc fascegn se à vadagnà “la medaes”

La zertificazion del livel musical di sonadores de la Bandes la é stata endrezèda per la pruma outa tel Trentin da la scola Il Pentagramma



Ence i musizist de Fascia pel se meter sul corpet la medaa che zertifichèa l livel musical.

Musega - Tel Sudtirolo l'è oramai na tradizion la zertificazion del livel musical di sonadores de la Museghes che aldò del livel arjont dèsc fora la medaes de bron, arjent e or.

Na zertificazion che i maestres de la Bandes de Fascia e Fiem à semper vardà con amirazion e proà a portèr ence tel Trentin. L'cunst l'era pontèr via con n projet pilot e troèr chi che aessa podù fèr da capofila. La proponeta é stata tutta sù da la scola de musega Il Pentagramma che, ge jan dò al model di sudtiroloeres, ge à dat l met ai bandisc de Fascia e Fiem de se fèr giudichèr da na comiscion esterna e se vadagnèr chela bramèda medaa. A chesta vida la scola de musega Il Pentagramma ge à ori la strèda a na scomenzadiva che se spera posse se slarièr fora semper de più.

L projet “Medaes” é stat conscidrà dai maestres de la Bandes de Fascia e Fiem na ezelenta ocajion de crescimonia musicala di componenc de la Museghes, che à podù cerner trei categories de livel e i se à ejibi tedant a na comiscion con dozenc di Conservatories de Trent e Busan, dozenc de la Musikschule de Ora e musizist profesionist che à valutà a na vida meticolousa i toc di candidac.

A chesta pruma edizion à tout pèrt bèleche na cincantina de bandisc de

Fascia e Fiem che se à dat jù dalbon con gaissa e empegn. L'è stat dat fora 23 medaes de bron, 16 de arjent e 5 de or.

L president de la Federazion de la Bandes de la Provinzia de Trent Renzo Braus, che à tout pèrt a la ejibizion de la categoria de or te Auditorium de la scola de musega de Tieser, à palesà sodesfazion per l'ezelent resultat arjont e l'è dit che l livel di bandisc trentins no à nia da ge envidièr a chel di sudtiroloeres. La medaa de or, chela del livel più aut, é stata vadagnèda da 5 musizistes che à portà dant, tedant a n gran publich, tòc de obligh, studies de repertorie e composizions de autores emportanc desche Schumann, Chaminade, Popp e Gaubert.

De chesta cinch brava musizistes doi les é fascènes: Angela Detomas al flaut de la Musega da Poza e Barbara Tamion semper al flaut de la Musega da Vich. L'autres trei les é de la Musega de Tieser: Lara Eccher al corn, Vittoria Deflorian e Marta Molinari al flaut. A chesta musizistes dassen de bie complimentenc.

Ma i complimentenc va zenz'auter ence a duc i etres musizist che se à metù a la proa, che se à dat jù ence jan endodanef a scola per arjonjer n bon livel.

Chiò uzon fora i fascegn de la cater

Museghes de Fascia che se à vadagnà la medaes de arjent e de bron, che i é en dut 11, 6 con chela de arjent e 5 con chela de bron.

Se à vadagnà la medaa de arjent: Alessia Camerano al clarinet de la Musega de Vich, Mathias Pezzei al clarinet de la Musega da Poza, Alessandro Rasom al sax tenor de la Musega de Vich, Francesca Riz al clarinet de la Musega de Moena, Chiara Rizzi al clarinet de la Musega da Poza e Virginia Valentini al clarinet de la Musega Auta Fascia.

Se à vadagnà la medaa de bron: Chiara Capovilla al clarinet de la Musega da Poza, Ivan Pederiva al bombardin de la Musega de Vich, Elisa Somavilla al sax de la Musega de Moena, Giovanni Soraruf a la tromba de la Musega de Moena e Vanessa Tomasi a l'oboe de la Musega da Poza.

Da uzèr fora che chest l'è ence l resultat de na colaborazion percacenta anter la Bandes de Fascia e Fiem e la scola de musega Il Pentagramma, che se à tout sù la formazion di arlieves de la Museghes. N suzess che porta gaissa a museganc e insegnanc e che envia a se dèr jù per chest projet ence i egn che vegn.

Monica Cigolla